

## Rusizi: Umuturage watemye Dasso yarashwe arapfa

Yanditswe na [Sitio Ndoli](#)

Kuya 20 Mata 2017



Mahoro Jean Bosco wari watemye uhagarariye Dasso mu Murenge wa Kamembe amuziza ko yaje gusenya inzu ye yubatswe mu buryo butemewe n'amategeko, yarashwe mu gitondo cyo kuri uyu wa Kane ubwo yashakaga gutoroka aho yari afungiyeye.

Yari afungiyeye kuri Station ya Polisi ya Kamembe, umuryango we wabwiye IGIHE ko wamenyeshejwe ko uyu musore yafuye arashwe nyuma yo kugerageza gutoroka.

Umuvugizi wa Polisi mu Ntara y'Iburengerazuba, CIP Theobald Kanamugire, yemeje aya makuru avuga ko uyu musore ashobora kuba yatinye uburemere bw'icyaha yakoze agashaka gutoroka.

Ati " Ashobora kuba yatinyaga uburemere bw'icyaha yakoze bikamutera gutoroka ubwo rero umupolisi aramurasa aza kwitaba Imana. Byabaye saa kumi n'imwe za mu gitondo nibwo basohora abafungwa bagiye kwisayidira (mu bwiherero). Yagerageje gutoroka yiruka kandi umupolisi wari umurinze nta yandi mahitamo, gusa ntabwo aba agambiriye kumwica."

Kuri uyu wa Gatatu, tariki ya 19 Mata 2017, Umunyamabanga Nshingwabikorwa w'Umurenge wa Kamembe, Gervais Ntivuguruzwa, yari yasobanuriye IGIHE uko byagenze kugirango uyu mugabo ateme uyu mukazi wa Dasso.

Ati "Mu ma saa tatu bari mu kazi hamwe n'abakozi b'Umurenge bari gusenya inzu zubatswe mu kagari bitwikiriye icyumweru cy'icyunamo, bubaka inzu z'ibiti, uwo muturage turamwihanangiriza kenshi, akomeje gutsimbarara rero uyu muni dufata umwanzuro wo kuyisenya. Nta mwanya munini bari bamaze, umuhungu yari yifungiranye mu nzu aza gusohoka afite umuhoro ahitira ku mu DASSO wari inyuma amutema mu gahanga.

## Rusizi: Umuturage yatemye DASSO yari mu gikorwa cyo gusenya inzu yubatswe mu kajagari

Yanditswe na [Sitio Ndoli](#)  
Kuya 19 Mata 2017



Umuturage wo mu Kagali ka Ruganda, Umurenge wa Kamembe, yatemye umukozi wa DASSO witwa Venuste Ndahagaze ubwo yari mu gikorwa cyo gusenya inzu yubatswe mu buryo butemewe n'amategeko.

Umunyamabanga Nshingwabikorwa w'Umurenge wa Kamembe, Gervais Ntivuguruzwa, yabwiye IGIHE ko ibi byabaye mu gitondo cyo kuri uyu wa Gatatu, tariki ya 19 Mata 2017.

Yagize ati "Mu ma saa tatu bari mu kazi hamwe n'abakozi b'Umurenge bari gusenya inzu zubatswe mu kajagari bitwikiriye icyumweru cy'icyunamo, bubaka inzu z'ibiti, uwo muturage turamwihanangiriza kenshi, akomeje gutsimbarara rero uyu muni dufata umwanzuro wo kuyisenya. Nta mwanya munini bari bamaze , umuhungu yari yifungiranye mu nzu aza gusohoka afite umuhoro ahitira ku mu DASSO wari inyuma amutema mu gahanga. "

Akomeza agira ati "Ariko ntabwo yahise amutema, DASSO yabanje kumuhunga, undi amwirukaho kugera nko muri metero 10 aramutema, ariko abantu bamufashe agishaka gukomeza kumutema."

Ndahagaze Venuste watemwe yahise ayanwa ku bitaro bya Gihundwe.

Uwatemye DASSO yahise atabwa muri yombi, ubu afungiyeye kuri Sitasiyo ya Polisi ya Kamembe.



*Inzu yubatswe mu kajagari DASSO yatemeweho*